

四庫全書

集部

欽定四庫全書

古今禪藻集卷十二

明釋正勉釋性通同輯

宋

七言絕句

書南山六和寺

契嵩

二首

青葱玉樹接溪岑
臺閣凌虛地布金
行到白雲重疊處
水聲松韻淡人心

早起

天窓月過星踈渺檐際冥分雲窈窕山家深處勿難啼
時有寒鷄來報曉

題師子峯

重顯

踞地撐空勢未休爪牙安肯混常流天教生在千峯上
不得雲擎也出頭

偶題

遇賢

門前綠樹無啼鳥庭下蒼苔有落花聊與東風論箇事
十分春色屬誰家

雁蕩山

惟一

四海名山曾過目就中此景難圖錄
山前向見頭白翁
自道一生看不足

蠅子透窓偈

守端

為愛尋光紙上鑽不能透處幾多難
忽然撞著來時路
始覺平生被眼瞞

歸山吟寄友

清豁

聚如浮沫散如雲聚不相將散不分
入郭當時君是我

歸山今日我非君

閒居

顯忠

竹裏編茅倚石根
竹莖踈處見前村
閒眠盡日無人到
自有清風為掃門

山居

懷志

萬機休罷付癡憨
蹤跡時容野鹿參
不脫麻衣拳作枕
幾生夢在綠蘿庵

詠夏雲

奉忠

如峯如火復如綿飛過微陰落檻前大地生靈乾欲死
不成霖雨謾遮天

山居

志芝

千峯頂上一間屋老僧半間雲半間昨夜雲隨風雨去
回頭方羨老僧閒

秋江

道潛
三十
五首

赤葉楓林落酒旗白沙洲渚夕陽微數聲柔櫓蒼茫外
何處江村人夜歸

絕句

高崑有鳥不知名款語春風入戶庭
百舌黃鸝方用事
汝音雖好復誰聽

陶宣德逸老堂

湓浦城南舊隱淪一堂無地可栖塵
石牀春卧茶蘼砌
撩亂餘花落酒巾

歸來詩酒洽天機騷客無煩詠式微
三徑就荒松菊在
洗除蒿艾淨秋暉

夜渡采石

滄江夜半月沈輝
客子行舟失渺瀰
不用然犀剛照耀
波間百怪惡人窺

臨平道中

風蒲獵獵弄輕柔
欲立蜻蜓不自由
五月臨平山下路
藕花無數滿汀洲

江上秋夜

雨暗蒼江晚未晴
井梧翻葉動秋聲
樓頭夜半風吹斷

月在浮雲淺處明

春晚

疊穎叢條翠欲流
午陰濃處聽鳴鳩
兒童賭罷榆錢去
狼藉春風漫不收

東風池沼水翻瀾
春盡淮南麥秀寒
院落無人日亭午
柳花如雪滿闌干

邵伯道中

一道河流遠接天
兩行官柳復蕭然
村春歷歷鳴何處

彷彿孤煙落日邊

回首山光古寺基
拂天寒木耿斜暉
孤撐漸與鐘聲遠
但見風幡竹外飛

建隆秋夜

梵唄聲沉香霧銷
月明金殿影岧峣
夜深唯有龕燈在
風露滿庭人寂寥

淮上

蘆梢向曉戰秋風
浦口寒潮尚未通
日出岸沙多細穴

白蝦青蟹走無窮

天闊陰雲低抱樹沙寒鷗鷺欲親人
小航泊處誰家住
脩竹疎花宛似春

鶴林寺

宛轉回廊漫布金蕭條寒日墮墻陰
門前合抱松千尺
黃鶴不來年已深

鍾山夜月

萬壑千巖夜未央月華松色共蒼蒼
上方已覺無人語

金殿誰焚柏子香

子瞻席上令歌舞者求詩戲以此贈

底事東山窈窕娘不將幽夢囑襄王
禪心已作沾泥絮
肯逐春風上下狂

寄俞伯謨宣義昆仲

謝家蘭玉競芬芳千里南來未易忘
猶憶娑羅雙樹院
月明相對坐胡床

多病侵尋鬢已霜昔年交友半殊方
吳臺松柏今何似

想見龍蛇數尺長

夏夜

斗帳昏昏夜氣蒸
移床趁月卧中庭
紫薇花露霑衣冷
翻覺華胥夢易醒

下湖晚歸

屈曲莎隄引興長
宵辭芒屨踏秋霜
歸來已奏孤城角
撩亂梅花落女牆

秋日西湖

飛來雙鷺落寒汀秋水無痕玉鏡清疎蓼黃蘆宜掩映
沙邊危立太分明

欲跨高樓曠遠情無端秋雨苦冥冥崢嶸日脚漏雲處
瞥見遙山一抹青

春日

蘭英蕙萼競芳新左右吹香暗襲人江海久無騷客賦
一枝唯可薦靈均

清溪白石曉磷磷洗露桃花兩岸新欲覓劉郎家住處

但聞雞犬不逢人

春詞

輕雲著地柳垂絲
百尺高臺獨步時
遙愛南隣紅杏好
曉來新有過牆枝

濛濛小雨暗池塘
遠樹依微不辨行
可是晚來風更惡
杏花香亂撲回廊

春日雜興

池南池北日融融
水杏風蒲各占叢
幸有花枝能照眼

可無詩句補春工

城根野水綠逶迤
颭颭風船掠岸過
日暮蕙蘭無處採
渚花汀草占春多

訪勤上人

斷橋蒼壁倚溪斜
赤葉楓林噪晚鴉
可怕巖雲埋徑路
會尋流水到君家

華亭道中

白水茫茫天四空
黃昏小雨濕春風
五更百舌催殘夢

月到官河柳影中

與愚上人宿天竺

霜壓簾櫳露泣條
星河影轉斗垂杓
清言共失三更夢
錯恨芙蓉漏易消

淮上觀水

桐栢崑崙日夜傾
投溪注壑本無情
乍為含垢千尋濁
不作矜人一曲清

春陰

浮雲易作雨無端未放春泥十日乾
須信杏園憔悴煞從來花骨不禁寒

次韻高壽朋殿直喜雪

俄頃風雲變物華撒鹽飛絮鬪輕花
只應陋巷無貧者玉戶瑤階共一家

有司欲取寺松供朝用感賦

維琳

大夫去作棟梁材無復清陰覆綠苔
今夜月明風露冷悞他千里鶴飛來

詩聞于朝
詔留不伐

十竹

清順

城中寸土如寸金幽軒種竹只十箇春風慎勿長兒孫
穿我堦前綠苔破

北固樓

仲殊

北固樓前一笛風碧雲飛盡建康宮江南二月多芳草
春在濛濛細雨中

舟次

志南

古木陰中繫短篷杖藜扶我過橋東沾衣欲濕杏花雨

吹面不寒楊柳風

山居

法成
二首

四顧巍峩鎖碧陰
松風和雨響於琴
居山不用逃聲色
百鳥歸來何處尋

雪覆喬林同一色
清光上下含虛碧
採樵人立渡頭寒
極目圓蟾為誰白

無絃琴

止翁

月作金徽風作絃
清音不在指端傳
有時彈罷無生曲

露滴松梢鶴未眠

殘梅

德洪九首

殘香和雪隔簾櫳
只待江頭一笛風
今夜回廊無限意
小庭踈影月朦朧

海棠

酒入香腮笑未知
小粧初罷醉兒癡
一枝柳外墻頭見
勝却千叢著雨時

游西湖北山

幽草青青繞竹扉
雨餘人在杏園西
無端黃鳥驚春夢
正向綠蘿深處啼

過湘江題慈雲寺壁

慈雲寺在古城隈
月閣風軒照水開
獨倚欄干秋雨後
青山相逐渡江來

次韻西樓

萬古湘江繞故城
水光夕照動簷楹
行人仰看春風軟
吹落凭欄笑語聲

又登鄧氏平遠樓縱望見小廬山作

倚欄天際數歸帆春在滄洲數筆間我與小樓俱是畫
雨中猶復見廬山

與超然至谷山尋崇禪師遺蹤

行盡湘西十里松到門却立數諸峯崇公事跡無尋處
庭下春泥見虎蹤

廬山雜興二首

幽花踈竹冷捎雲江北江南正小春但得青山常在眼

不妨白髮暗隨人

別開山徑入松關
半在雲間半雨間
紅葉滿庭人倚檻
一池寒水動秋山

偶題

祖可二首

琴到無絃聽者希
古今唯有一鍾期
幾回擬鼓陽春曲
月滿虛堂下手遲

畫梅

不向江南冰雪底
便於毫末發春妍
一枝無語澹相對

疑在竹橋煙樹邊

詠水燈

道沖

萬里烟波接素秋
銀缸耿耿汎中流
自從一點光明後
逐浪隨波未肯休

詠魚籃觀音

僧朋

徒整春風雨鬢垂
子規啼徧落花枝
龍門上客家家是
錦鯉捉來賣與誰

偶題


道濟

幾度西湖獨上船
篙師識我不論錢
一聲啼鳥破幽寂
正是山橫落照邊

憶佛軒詩

晞顏

多年飄逝鬢如絲
憶佛難忘十二時
咄咄自嗟為蕩子
幾番花發路邊枝



古今禪藻集卷十二

欽定四庫全書

集部

古今禪藻集卷十三

四

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官中書臣葉葵

謄錄監生臣左熙世

欽定四庫全書

古今禪藻集卷十三

明釋正勉釋性通同輯

元五言古詩

重登牛頭峯

圓至 七首

霜葉黃蝶飛崖泉白蛇掛行行尋故迹往物已屢化高
步萬石上獨立一木下悠然顧吾影殘日在林罅古來
遺世士泯觀混真假所視既已齊乘險意亦暇智愚相

與奪得失紛代謝吾欲營力耕穿巖樹茅舍

雪

窓鳴風片亂溜凍冰條直夜久忽無聲傍簷時漸瀝青
薪燄方吐紅燈花欲滴閉閤有餘溫蒙衾兀重席

送勤減宗上人

出家旅殊鄉同里為骨肉况乃情所厚而茲忽分躅清
霜凋廣野露立凍羣木日暮行子身谿谷映餐宿吾聞
含德者凝視養玄矚疾進氣雖銳久踐途乃熟歲晏能

復來青燈共寒屋

贈玉龍曾道士畫龍頭

乖龍逃雨走急落西山
陬縮入畫仙筆雷公不能搜
畫仙有墨池尺水涵十洲
浴龍作玄骨騎入塵寰游
我求寫龍真畫仙許我否
形全恐飛去為君且畫頭

次韻陪星子胡主簿遊報先寺

木棲與淵蟠所性各有適
顧余丘壑戀大藥不醫癖
青山亦可人乍見如素識
森然一窻下獻此萬丈碧
簿領

三秦英軒昂謝塵迹壯齡已疊組舊閱況列戟潔身粉
黛側僧榻羣面壁國鼎筆可扛天機錦自織停驂偶相
值顧問借顏色東風吹芳原衆卉競春日遠郊農餉起
烟屋香芋粟牛鳴雨隴寒釋耒泥濺膝良時一游豫能
不念民疾二宮山水窟屨鉢恬食息含羞目斬絕詎意
陪履屐終期凌蒼巔一視空八極

澆園

養素稀肉食豆羹止園蔬角智區
噉間樂止在耰鋤火

晶赫秋炎綠疇曠為墟百憂視七筋豈為目無娛清池
有佳泉分決救其枯揮杓沃高畛聯筒注卑渠稍回焦
塊潤已覺拳葉舒連畦曉色開芳露晞鮮腴濯濯青甲
抽如沐春雨餘繁香翥疎戶未歎貧屋虛一飽便當已
五鼎將何如

和李使君十五韻

排律
誤入

臨淮功洗日遺澤在雲仍茅土開前列圭簪在後丞氣
凝瓊樹日神動玉壺水赤羽銜絃筈彤弓閑緄縢長鈞

工返鵲誤點巧成蠅秀句今無敵公才世共稱撫疲憐
肅肅取朽戒兢兢九府泉初溢雙輪秩更增瀟灘魚夢
熟淦水鰐波澄藻筆傳于為瑞衣製毳毼寒帷將問俗
懷綬且尋僧任大官難稱人存道可弘千林無祝網尺
水有懸罾尚急誼興譴崇寬律見繩小煩施利器遙竚
鶴書徵

猗蘭辭附

大訢 二十
二首

野漫漫兮葉施霜貿貿兮露滋露滋兮匪暘不晞彼美

不見兮以渴以飢湘之涉兮阻且躋挂長蛇兮吼玄羆
景翳翳兮厯崦嵫念徂歲兮愆芳期羌不畏乎色衰誰
招魂兮若有知溯長風兮覽余懷寄音塵於竹帛兮猶
不媚厥姿玉之蒨兮參差風之佩兮陸離芳霏霏兮闔
吾帷絙朱絃兮待之娛予之獨兮澹忘歸

思親辭

有叙

王君寶御史以游宦無常處圖先塋于軸歲時隨所
寓展祭之為作思親辭以致其思云

耳有聞兮如語目熒熒兮如睹來翩翩兮而欲舉條而
去兮疇與奠蘭烝兮桂酒我祭而享兮慰我荼苦念舊
居之衡宇今歸而乘兮驄馬泉深兮長溜木翳翳兮陰
茂篤孝思兮無數自我躬兮我後

山雲辭

有叙

千上人結庵餘英山中揭所居曰半雲夫雲之為物
不多寡大小形也而曰半何哉不以離世絕俗人不
得而友之能不趨利而合不避害而散同於無心疏

於無跡惟雲克肖焉於是空半室以居之朝夕容與而不異也笑隱子懼其久而忘之欲固其盟遺之以歌

南山兮朝隣夕容與兮水涯復儻徊兮余次賓而肅之
兮款扉撫瑤席兮布函丈樂無斁兮澹忘歸褰不瀆兮
去不違毋軼其疆兮猶有畛畦山中之人兮薜蘿衣游
萬物兮守天倪行之獨兮世無知匪雲之從兮其從誰
徐勉之有琴曰風篁為作風篁引

湘之波兮夕風夕風兮龍吟在泓韶之亂兮盈耳接鈞
天兮雲中雲穆穆兮葆羽下風肅肅兮雨瀧瀧渺梧江
兮涕無從漬土兮爾竹維篁鳳翩翩兮不其凰不念先
君兮勗萬邦

高門一首贈岳柱公

四言附

昔在唐虞比屋可封其民不知倥侗顓蒙五子歌夏棠
棣詠周漢興孝廉其俗日偷桑沃而隕泉流而遠歲不
我與子懷婉婉親之育我如不保矣我育我貴親之耄

矣親疾而呻我痛在腹親喪三年于日不足我圃我廬
于親之居枯槁猶存親食之餘我匪木石念之維何聖
訓是則靡知其它事君以忠友弟以愛以亢吾宗如親
之在乃作高門國有令典亦有卿公醴醕衍衍高門言
言過者必式于以作詩歌之無斁

客去一首送婁所性歸江西

客去復留客留終去罷吟夜風鳩乳新雨有匹鳴鳥灌
木潏潏豈無交友不如晤語亦有多譽東帛乘馬無爽

金匱要略卷十三
我懷我疾過愈

瞻雲亭詩

有叙

張君克禮赴任南臺御史以不克歸養誦狄公白雲
親舍之語感而作瞻雲亭以寄其思夫愛其親而朝
夕養者人情之常窮閭委巷皆能然也而士之有才
有志必期於樹勛業流聲實於無窮思所以榮顯其
親其親之命子亦若是而已故有出仕四方問道千
里而曾子所謂以志養親者也然道降俗薄或因是

以流連沈湎蕩厥良心而日遠日忘其親者有之克
禮才茂器宏年方彊仕貴顯矣雖盡悴王事而無時
忘親推是心以臨吏民施刑政措之天下豈外是哉
予幼以親命學佛而不能弘其道忝居官寺比乞退
欲效古人織屨為養未獲所請視克禮微顯有間而
所感則同也作瞻雲亭詩

雲濟于天條往而還我行于邁以日以年雲之將雨翳
翳其陰孰無父母獨勞我心我次于野飲馬于河載旌

揚揚其儀孔多鵬鷖海運豕豢于牢乃分之宜豈曰賢
勞占子歸矣鵲集于桷思榮于家子有高爵賜號與秦
曳組若若載笑載言與子滿酌

畫蘭

爾烝維藉我佩斯紉有肖于德薰然而春匪夷匪惠國
士振振高風百世懷哉若人

泉石為銘君安賦

泉之始達維石齧齧不盈瓶罍而酌不竭決而疏之為

江為湖澤及于物不如其初是故君子道不苟售雖有
夔臯愧于巢由我石孔貞我泉孔腴維德似之永矢弗
渝

期石室不至 五言

風水不可期知君定來否何處唱歌聲月明大谿口

心遠堂為吳江張清夫賦

適性無廣廈安居自光榮我生亦解后均爾衆物情方
春戒穡事孰謂吾無營濁醪聊自適客至亦共傾喧寂

庶可齊所貴吾道貞
瞻言邈千載惻惻茲抱盈

題程仲華西行集

程仲華眉山人士少離故鄉居金陵數十年既老歸省墳墓嘉其高誼為題其西行集

歸鳥投故林落葉庇本根人生首丘念所重骨肉恩蜀土昔離亂脫身問道奔及茲承平久慈孝況所敦苦心在丘隴志不慕田園敢辭萬里遠衣薄霜露繁白首攜仲子斗酒酌幽魂墟里盡荊棘故老無一存幸託賢守

令大書刻墓門乘詩無國史傳之令子孫

送楊子承臺郎

六旬苦不雨寢食不遑安佳人重遠別西風古長干辟
書豈無華中臺切雲端執簡贊畫諾羣彥集孔鸞丹心
照白日雄辭瀉驚湍所愛溫如玉何須鉄作肝賢才期
有用行志良獨難上言保明哲下以濟時難關陝民食
子蜚蝗蔽淮灘便須給餽餉胡能及朝餐維斗不可酌
西望銀河乾安得仙人掌盤傾玉露溥

送江希顏兼呈佛智師

豐草霜不死孤陽地中回佳人獨憔悴窮居謝行媒
竭來為親友飲馬寒江隈雞鳴戒蓐食晨發急景催
念子篤孝道每食涕盈腮霜露感祥練聞琴有餘哀
我生非人類未可置蒿萊師老不得養疇當恤凶灾
尺書那忍寄未語先心摧驪駒且勿歌作詩補南陔

追和洪景廬內翰題龍臺寺韻送曇西竺

中年涉憂患事與壯心違誅茅依礪曲我歸已無時上

人受經地遠赴千里期江烟連竹色香露滴薔薇重關
無拒客政使過門稀只許毘耶老天華不著衣

賦得露盤送邵本初侍親之括蒼

露盤何亭亭高挹南山青南山豈終固托茲金石貞方
諸貴同潔九鼎儼或輕芳澤晞朝日恩光照紫庭瓊液
寒初凝黃流注不盈我願為膏沐漻然一氣清蒹葭既
堅落蓼蕭亦滋榮但念括山遠沾衣戒宵征仙人餌玉
屑游子慕藜藿情亦欲脩甘旨非闕學長生

送觀志能臺郎赴都得勸字

皎皎瓊林枝一見足良願三年獲周旋臺端肅懲勸野
吹結夕陰江烟帶寒蔓歌長步遲遲庶以展懷戀

次韻石室贈琦上人

啄木驚我夢丁丁伐平林書來叙別久長憶倚梧吟重
江蛟鰐橫感子遠訪尋氣肅蟄戶閉天高鳥遺音楓林
生野吹河漢蕩秋陰相期如古人庶以展我心令躬崇
道德不貴玉與金

送欽上人

我有錦繡段翠鯨卷波濤
君家古刀尺裁剪不憚勞
散作五色雲隨風九天高
天高望不極江水日滔滔

題畫

遠山如故人夢寐思見之
見之了非夢卜居可無期
乃知畫者意善幻牽吾思
居然礪之曲彎碣俯茅茨
川容得春媚渙渙流晴澌
魚畧散蓬蒿鹿瞳縱橫馳
澄江起暮色客袂風淒淒
其所歷紛可數身世亦足
悲百年俱幻

境對此奚獨疑

感興

卧病長江上朔風撼我床
泥垣壞積雨弱柳空自長
猶懷嵩璉歸何曾羨奎章
白壁忍橫道千金戒垂堂

其二

鳳皇五色羽風雨傷摧殘
坐視不遑恤百憂如驚滿
我夜不得寢我食不得餐
因知古人意相戒行路難

山中吟

清珙十首

林木長新葉
遶屋清陰多
深草沒塵跡
隔山聽樵歌
自畊還自種
側笠披青簑
好雨及時來
活我新栽禾
遊目周宇宙
物物皆消磨
既善解空理
不樂還如何

其二

月來照我門
風來吹我襟
勸君石上坐
聽我山中吟
玄鬢化為雪
朝光成夕陰
萬事草頭露
豈得長如今

其三

飯飽拂石睡
睡足起閒行
靄靄孟夏景
新樹鳴黃鶯
俯

仰翫時物散誕暢吟情只此是真樂何必求虛名

其四

山中一雨滋原上百物好手種三畝薯亦可延昏早咄哉世間人名利常關抱頭上雪紛紛胷中塵浩浩

重巖之下六首

附四言

重巖之下火種力耕有粟有蔬可煮可烹了我目前樂
我餘生坐眄庭柯幾度衰榮

重巖之下草莽日交人影不來黃葉飄飄谷鳥晚啼山

月夜高松露鶴飛濕我禪袍

重巖之下蛇虎為隣我心既忘彼性亦馴人生在世各
具天真含齒戴髮胡為不仁

重巖之下靜默自居三際不來心如境如斜月半窗殘
火一爐嗟彼睡夫蝶夢蘧蘧

重巖之下目對千山一根返源六處皆閒白雪飄飄綠
水潺潺動靜自忘別是人間

重巖之下不修形骸水食草衣布襪筍鞋竹密暗窓苔

深覆堦蕭馬忘情寂爾虛懷

示友

維則 二首

逝水不復返黃葉無重榮萬物有終極浮生欲何成
緣一染指智慮常縱橫寧知昨日事轉眼多變更聖人
示教器稍滿還復傾及時不自惜時去空傷情

登西林

沉鬱難自居偶思散遐矚拄杖登西林斷崖倚修竹
上叢花閒飛禽自相逐崖下清川流水光泛嘉木四月

風雨多平野一時綠長嘯白日低烟雲起空谷俯視萬
化間勞生亦何足

歸雲亭

清欲二首

作亭竚歸雲雲歸宛亭亭道人本無心澹與雲相應夾
徑樹嘉木沿溪羅翠屏人間境逾寂雲白山自青看山
坐亭上披雲濯清冷

聽松堂

風來松韻清風去松韻停松堂得松韻六月生清水重

陰覆瑤席時作韶鈞鳴世無寒山子好在誰解聽我欲
呼朱絃和此太古音忽聞深澗泉悠然契吾心

滄瀆壘

晉袁崧禦
孫思於此

壽寧

江迴原野迴海翻波濤起征客薊門歸弔古滄瀆壘平
疇麥草青溢土箭鏃紫月黑動北風寒鴉聲在水丈夫
澄清心俛仰在萬里

感興

本誠二首

賢士志宏廓不以官拘身達士理明徹不以身拘神百

年在瞬息營營徒苦辛華表鶴歸來城郭非舊人冥心
合元化庶以全吾真

貧居

造物非貧我欲我閒且安貧居自有樂此樂非人間蕭
然一茅宇十年卧空山山深無客來獨與雲往還芟荷
製冬衣藜藿供朝餐登山玩崔嵬臨流聽潺湲為無貪
著念隨地可盤桓但得閒中樂豈以貧為艱愈貧愈無
事無事心愈閒雖居人世中恰似出塵寰

詠史

敦弓黻明月決拾生清風一發期必中大射師友同學
成遂專巧教者初無功其心既殺羿天下惟一蒙含戴
亦齒髮位置三才中如何懷此逆天地或爾容嚙鏃果
有術肆毒應無從蚩蚩一為鑒維以保令終

石燈

四言附

石生東夷何山之岑斲而為器職是照臨受以芳澤不
自滿溢秉心維中超焉弗溺闇闇之夜幽幽之晨表裏

一白無緇無磷其用也燈其捨也石匪損匪加日章其德不其類之胡不媿之

定公生焚詩

并叙

吾釋氏者定世古昆吾人客漳久之僑居開元寺業白以老至元四年秋峒賊來攻城甚急漳人莫知所出定公禮空而祝曰使城不陷賊吾當火吾身以答已而果然越六年夏遂累薪為龕室西郊行與衆訣衆留之不可乃自燔其間其火之始張也人視之泰

然無毫髮惴惴色郡人咸大駭異請即其地作塔廟
以祠於乎定以誓故生而自焚宜若得罪於名教者
然與夫食人之食而見危不能致命立人之朝臨大
節而變者不亦遠乎哉况定之心以一身全一城之
死靡渝亦宜若無得罪於名教者也抑吾聞之定老
出世學其成就豈此哉人殆見其膚耳定之詳予實
得之靈源上人源與之同居又將經始其祠者且請
予為之詩曰

羣兇白日至梯衝舞嚴城疇能身獨死而俾城不傾定
公出茲誓金石開精誠未幾來訊醜復見溝壘清前言
儻云食吾將負神明積薪自厝火怡然就無生何意金
石軀條忽煨燼成顧此乃餘事足為流俗驚塔廟遂翼
翼鐘鼓初皐皐為國效死節勛哉爾簪纓

夏日同趙生鄭生許氏兄弟遊龜山山有大石下
有遺址相傳歐陽詹讀書于此因造焉相與慷慨
賦詩分韵得魚字

閒情素乖俗樂彼中林居林居未云果幽賞意有餘出
郭青山多佳木亦扶疎並遊得良友方駕從所如翠微
薄炎景蘿風汎涼裾雲逕步窈窕石門入清虛少留席
豐草綠纏綿以舒叢柯翳鳴鳥石澗清有魚形神一蕭
散疲勩亦已祛黃緣龜巖東遂即歐陽廬懷賢仰高躅
撫蹟驚廢墟願留石中室畢誦人間書茲焉恐遲暮眷
眷空躊躇

造唐山人居

行行野田盡荒蹊入秋水何人有新屋鬱鬱松林裏欣然造其門晤言乃君子解衣坐微涼超遙適閒美日澹踈雨晴山色散窻几石上聞鳥鳴林端見雲起平生事外心即此胡不喜少暇同飲泉幽期自今始

至正辛丑秋七月十有三日永嘉曾睿以休假同高巽志徐一夔鮑恂牛諒諸公出西郭憩景德寺攜樽相慰藉環坐乃以唐人因過竹院逢僧話又得浮生半日閒之句分韻賦詩予得院字

智寬

涼颼動新秋遠寺集羣彥虛簷靈籟發列坐停揮扇情
愜引杯觴懽劇雜酬獻酡顏映落日林光散凌亂池深
魚自樂林密鳥相喚芳桂攀幽叢天香滿西院懷哉鄭
廣文樗散絕崖岸

送石仲德司丞

克新 二首

戎馬生四郊避難去鄉國鄉國豺虎多十年歸不得旅
食大江南田野亦荆棘游魚潛舊澗飛鳥栖故林天地

物尚爾我獨何為心驅車戒遠道歲寒冰雪深兵革方
去息長淮渺烟草況有簡書縈豈止還家好政餘事耕
桑虛名奚足道

會陳彥博編修

自昔合并難況乃干戈際陳君去京國一別彌年歲耿
耿在中懷烽烟邈迢遞忽復乘海槎銜命自天帝四牡
稅中林徒步屏奴隸入門坐我床驚呼喜欲踰劉君吳
門來邂逅成夙契為予信宿留諧笑忘形勢官市沽春

醪幕雨剝寒薺勸君各盡觴與君聊玩世雲端皓月升
城外終風曠且勿疾其驅茲會良可繼

古今禪藻集卷十三

欽定四庫全書

古今禪藻集卷十四

明釋正勉釋性通同輯

元七言古詩

題平陽龍神張誠叔別業長歌

溥光

始山之東山之隅龍神風物美且都泉清樹茂田膏腴
中有太古仙民居云是先人之故廬龜趺千字存遺墟
右岡左林跨修途前潭後阜開畫圖柳塘竹塢當門閭

藥畦花圃相縈紆三間茅屋藏堪輿延賓有齋爨有厨
壁間縣琴架積書文楸在榻酒在壺棣花春風歡友于
紫蘭芝草羅庭除田蠶春磴賈陶漁牛羊騾馬雞豚鳧
絲麻委婢耕委奴歲時足以供百需打門未始驚追胥
逸屋時聞幽鳥呼主人況乃非世儒王門懶曳鄒枚裾
胷中素有廊廟謨冥鴻未可世網拘振衣歸來弗躊躇
青鞋布襪竹杖扶南窗寄傲忘居諸一觴一詠日自娛
高情澹澹寄太虛出岫野雲同卷舒寬兮綽兮矩不踰

優哉游哉樂有餘人間有此安養區
輞川盤中未必如平生我亦山澤癯
所經佳勝神與俱田園至樂獨讓渠
知君之樂孰若吾

留題惠山寺

明本

惠山屹立千仞青俯瞰天地鴻毛輕
七竅既鑿渾沌死九龍攫霧雷神驚
霹靂聲中白石裂銀泉迸出青鉛穴
惟恨當年桑苧翁玉浪翻空煮春雪
何如跨龍飛上天併與挈過崑崙巔
散作大地清涼雨免使蒼生受辛苦

我來扣泉泉無聲一曲冷光沈萬古殿前風檜若然鳴
日暮山靈打鐘鼓

思洞庭寄承天寺覺庵老師

行端

烟蒼蒼濤茫茫洞庭遙遙天一方上有七十二朶之青
芙蓉下有三萬六千頃之白銀漿中有美人兮佩服金
鴛鴦游龍車明月璫直與造化忝翱翔憶昔天風吹我
登其堂飲我以金英八月之沆瀣食我以崑丘五色之
琳琅換爾精髓滌爾肝腸灑然心地常清涼非獨可以

眇四極輕八荒抑且可以老萬古凋三光久不見兮空
慨慷久不見兮空慨慷

月支王頭飲器歌

大訢八首

呼韓款塞稱藩臣已知絕漠無王庭馳突猶夸漢使者
縱馬夜出居延城我有飲器非飲酒開函視之萬鬼走
世世無忘冒頓功月支強王頭在手帳下朔風吹酒寒
凝酥點雪紅爛斑想見長纓繫馬上髑髏濺血如奔湍
手麾欲回斗杓轉河決崑崙注尊滿酒酣劍吼浮雲悲

使者辭歡歸就館古稱尊俎備獻酬孰知盟誓生戈矛
斬取樓蘭縣漢闕功臣猶數義陽侯

曹娥江讀碑圖

海門五月潮如山龍伯鬩肩蒼蛟頑越俗輕生好巫鬼
婆娑踏舞洪濤間羣巫姣服盱獨好歌聲忽絕紅旗倒
孝娥死抱父屍出天地無情日杲杲雄詞不愧邯鄲兒
萬金莫購中郎題碑陰八字非隱語德祖有智如滑稽
豈是阿瞞不解此感媿上馬歸路迷女德猶能奮其節

壯夫氣吐萬丈霓，奸雄復欲欺後世。
白頭猶愛漢征西，丹青似是董狐筆。
千年要與竹帛齊，娥江新廟照江水。
可憐銅爵草萋萋。

太白觀瀑布圖

我本白雲人，見山每回首。
披圖得松泉，感我塵埃久。
我家只在九江口，從此扁舟到牛斗。
翻愁天上銀濤堆，石轉雲崩萬雷吼。
水行地底不上天，龍泓豈與滄溟連。
風葉無聲飛鳥絕，月光雲影天茫然。
丈人何来自空谷，謫

仙招隱當不辱林梢噴雪舞飛華尚想隨風唾珠玉馬
首青山如喚人歸來好及松花春泉香入新釀解公頭
上巾今者孰不樂荒墳委荆榛遂令畫師意萬古留酸
辛酸辛復何益東海飛紅塵

駿馬圖

世無伯樂亦久矣駿馬何由千里至披圖猶似得權奇
豈伊畫師知馬意何人致此鐵色驪旋毛繞腹新鑿蹄
帝閑遠謫天駟下馳來月窟浮雲低古王有土數千里

八極周游寧用爾方今萬國效奔命合造龍媒獻天子
臧馳電沒爭辟易萬里所向無前敵男兒馬上定乾坤
腐儒詩書果何益幾愁骨折青海烟黃沙野雪穹廬前
幸逢好事寫真傳似向長鳴誰與憐嗟我身如倦飛鳥
十年繭足愁山川安得千金購神駿攬轡欲盡東南天
初發金陵夜泊龍灣寄茅山道士李方外

人生不必行萬里亦不願讀萬卷書願為茅山十日客
山僧坐列羣仙圖大峯揚旗出天闕小峯萬馬爭奔趨

俄頃波濤忽破碎木末飛上金畢逋青書畫馳壇室靜
玉鞭夜擊聞傳呼去年獨宿丹井下天風拂地迎麻姑
今年許入玉柱洞誰遣旅食隨檣烏懷人弔古夜寂莫
寒江落月號猩鼯祖龍埋金王氣歇梁宮晉苑沈烟蕪
想見雲龍映朝日山中宰相良非迂

宿牛頭巷

延祐甲寅十二月登牛頭山雪後見草菴如壺有淵
道人居之從一竇俯入中可丈五設一柴床無他長

物客至則立語謝客客故去淵以半坐分我且言始至從樵者丐舂茅席地為坐淫雨沮如翹立終日居人始憐我有周文卿為構瓦屋三間而子適至豈有所待耶敢以菴累子一日會周相歡如平生翌日作詩相留子既慕融公高風欲憩止焉而志不果作短歌謝周

憶昔壯年游東溟大船推鼓江上行天女吹華龍象舞風水夜作蛟鮪驚浩歌聲戛牛斗上百年有志非功名

箋紅宥讓甘露滅上書獨許嵩仲靈青春悠悠去不返
萬里孤蓬尚漂轉可憐歲晚長干城冰雪連天江漢遠
紫雲如蓋青石寒必逢勝處一解顏平生始識周處士
臨歧握手俱忘還老子胸中飽丘壑道人眼底無江山
十日茅茨卧風雨便擬挂錫烟蘿間師年八十不可待
又欲為母營朝餐况聞大法可痛哭我心安得如石頑

顏暉耕牧漁樵圖

南陽草廬人已非短衣飯牛歌獨悲渭濱之叟非熊羆

買臣五十印累累江湖與子終忘歸北風吹面鬢如絲
曹伯珪築室曰桂齋戲作俳偕體

阿仙騎蟾白銀闕醉折秋華餐玉屑霓裳曲散墮清塵
涼夜素娥悲白髮玉輪碾香空翠寒流光萬里君合歡
大星漸低海色白高齋翠影空團團萬卷芳心期厚地
憔悴秋香忍相棄百年苦使富貴羈淮南小山歸不歸
登霞霧山

清珙

晴明無事登霞峯伸眉望極開心曾太湖萬頃白瀲灩

洞庭兩點青濛茸初疑仙子始綰角碧紗帽子參差籠
又疑天女來獻花玉盤捧出雙芙蓉明知此境俱幻妄
對此悠然心未終徘徊不忍便歸去夕陽又轉山頭松

寄雪竇寺生書記

印秋海

清泉白蘆八月秋寬鞋瘦策十日遊石床風冷夜不寐
冰絲繞指白雪流身名杳杳雲間鵠世事紛紛蕉下鹿
雨晴春暖即相尋千尺巖頭看飛瀑

篳篥引

維則十二首

西瑛懶雲窩距予禪室半里許時相過從吹簫簞以
為供復於予言有所需乃賦長歌以贈

西瑛為我吹簫簞發我十年夢相憶錢塘月夜鳳皇山
曾聽酸齋吹鐵笛初吹一曲江風生餘響入樹秋鳴咽
再吹一曲江湖驚愁雲忽低霜月黑坐中聽者六七人
半是江湖未歸客歡者狂歌繞樹行悲者垂頭淚沾膝
我時奪却酸齋笛歛襟共坐松根石脫畧悲歡萬念消
悟聲無性聞無跡西瑛簫簞且莫吹簫簞從古稱悲栗

悲歡茫茫塞天地人情所感無今昔山僧尚賴雙耳頑
請為西瑛吐胃臆聲聞相觸妄情生聞盡聲亡情自釋
盡聞莫謂聞無聲機動籟鳴無間隔亡聲莫謂聲無聞
去來歷歷明喧寂吹者之妙余莫知聞者之悟公莫測
公歸宴坐懶雲窩心空自有真消息

送月維那歸鄉就寄哭師省母二首

鐘鳴南山兮日上西湖行子叫船催寫書書成滿紙如
塗烏近日哭師雙眼枯去心一動難須臾我以魂夢隨

程途五月六月能來無

故家西村北倚門白髮無朝夕故業西村西夜雨高堂
有靈骨相尋時莫匆卒天涯一字良難得重來時莫匆
卒天涯一字良難得

城南樓

城南樹尾花風晴城南樹下漁舟行隔溪竹屋數家酒
矮籬路轉人縱橫仙山石洞在眼底塔竿倒影滄波明
相期待渡日已晚坐看平野青烟生

入仙洞山

入山隱隱如聞雷
山雞閣閣隨人飛
松風洗我市喧耳
松露洒我青羅衣
平生結習重幽賞
會景會物情依依
誰能歌紫芝
我當歌采薇
招呼雲外青鸞歸

送甘茂實入京三首

君莫羨天馬駒
亦有汗血牽鹽車
君莫笑涸轍魚
海翻會與蛟龍居
丈夫出處繫元運
豈必似東門瓜圃南陽
草廬君家太白山
之東畫梁烟雨春濛濛
上淮淝兮度

五嶺鬼門銅柱悲途窮歸來江南六七郡杖劍落落隨
羣公讀書汶上少閒日結屋贛水多秋風父骨未藏母
亦老布衣塵土行人同時乎時乎子豈終不遇乎

君亦善河洛書點畫萬象知盈虛君亦善長行歌勢壓
李賀欺東坡朝登霞氣嚙沆瀣夜坐北斗窺銀河千金
入手弄瓦礫萬語出口翻春波平生一醉動三日仙徒
將種疑曾識幾回夢得仲連與公瑾並馳鏃駟隨天蹕
爛柯碁洞賓墨能事相逢俱辟易材兮材兮子豈終不

用兮

我不願送君行愛君筆硯傾平生我不願留君住男兒
四十當強仕盛時天下文軌同萬國軒裳滿都市願君
走馬燕山頭一語動世旋封侯風葉兮颼颼江波兮悠
悠丈夫萬里更萬里一飲百斗空離愁去兮去兮子豈
非丈夫兮

贈鍊師樓半雲

樓師作室名半雲人謂室與雲平分吾知樓師不如此

室與半雲寓言耳半雲之室如太虛我與萬物為同居
半雲為物半雲我物我半雲無不可以我之靜應物之
動我得物體物備吾用是吾與真宰者同遊不逐世態
為浮休試往觀乎歌臺舞榭曾不異乎玄圃滄洲苟捨
是而求入半雲之室半雲為之橫點頭

和送梁壽川之任南康醫教

君不見眼前病癖無全人又不見杏林種雨年年新豈
如梁君小試醫國手飄飄捧檄行青春行行東向廬江

路星渚風烟彭蠡樹雙池看瀑九江晴五老聞鐘亂山
暮我憐民物瘡痍深養生未必非其心元陽扶植起枯
朽一草已足酬千金莫辭印綬非君意虎溪未許陶公
醉會看採藥上蓬萊長裾曳破燕山翠

真州送別悅希雲

欲別不別重相携別思已逐寒雲飛飛雲一去不可得
千村萬落明斜暉回頭望吳山滿目青依依亦如送我望
我去立盡風烟未忍歸

送止照歸古洪曲江

莫雲飛上錢王臺
亂峯蘸碧湖光開
六橋秋色看政好
之子不肯重裴回
百年萬事烟雨過
鄉井一念終難灰
浩歌歸去送歸去
夢斷楚水何時來

綠雲洞

壽寧

綠雲千頃堆琉璃
雨洗烟霞生竒姿
忽然變滅不可記
月色照耀如天衣
天衣拂石鏘璫珮
萬籟微音出幽邃
藻荇浮空積水明
洞中綠雲光破碎
綠雲反復為師妍

師方宴坐交人天是身如雲我何有雲豈俄爾相周旋
人間萬事如轉燭洞亦非雲亦非綠此題此歌今已多
桑下浮屠不三宿

秀巖贈挺首座

清欲 三首

千巘秀出萬物表下視乾坤一何小散華無路到諸天
只許青山自圍繞青山不礙白雲飛丹厓豈逐春風老
擬問巖中事若何春來拂曉聞啼鳥

香巖贈芷首座

旃檀香風滿巖谷蘭芳芷秀同芬馥萬木千林競獻酬
鼻觀無聞心自足道人坐我巖之中徧身毛孔吹香風
八萬四千身衆海互相涉入俱融通舉一毛端衆毛集
一一香光翠雲濕不出普賢毛孔中誰道心聞無路入

送真藏主遊台鴈

台山鴈山高且寒五月六月飛水湍山形杖子既在握
探賸自可資遊觀危峯爭為寶幢立線路或作羊腸蟠
不知應真說何法但見花雨飛漫漫

大雪行

善繼

玄冥之月歲庚午江南雪深一丈許衾裯斗粟何處尋
凍臥饑氓不開戶妻啼兒泣面西東天高聽卑欲誰訴
去年一極旱火赤今年一極大雨注官倉私廩例空虛
蒼生何以守環堵西北風塵未盡消當道豺狼又含怒
明年粟麥縱連雲揮涕無從扣箕禹憑誰寄與東諸侯
恤民有道無輕舉君不見曩時桑大夫慘刻祇取身滅
誅又不見只今曹黃須擢髮數罪憐渠愚

吳江長橋

本誠

天險不可梯白石不受鞭空疑幻人試幻術神輸鬼運
來塵寰躋濤駕浪逕空濶盤結鈎鎖金聯環又疑東海
躍出萬丈白玉虬挾風噴雨飛上天天高九萬不得上
翻身飛墮長江邊蒼雲半濕瓊瑤冷弱水不隔蓬萊境
兩岸遙分白月光中流壓破青天影江吞湖吐水勢雄
南極地缺棲魚龍橋成壯觀奪天巧却笑造化無全功

築城曲

大圭 六首

築城築城胡為哉使君日夜憂賊來賊來猶隔三百里
長驅南下無一跬吏胥督役星火催萬杵哀哀旦雲起
賊來不來城且成城下人語連哭聲官言有錢顧汝築
錢出自我無聊生收取人心養民力萬一猶能當盜賊
不然共守城者誰解體一朝救何得吾聞金湯生禍樞
為國不在城有無君不見泉州閉門不納宋天子當時
有城乃如此

和簷生春雨寒歌

十日春九日雨空屋貯寒寒色苦曉雪都成陌上泥暮
雲不見城東樹所思今何處相去纔幾許獨將寸心寄
短琴琴老無絃暗塵土東風吹落錦一幅文章字字成
金玉中有苦寒詞詞古聲更悲廢歌我不忍上訴蒼蒼
知俗眼瞳人久生脂競收瑣尾遺瑰奇野禽乘軒士徒
步黃土被繡人無衣天公有意回春燠千林一夜生紅
綠長年呻吟臥掩門人生不解同草木君勿歌春雨寒
我有兩耳愁心百盤爐空葉已灰屋漏苔生椽簷聲夜

夜春水懸人間惟我與子同此味鬢髮未白書如山春
雨寒歌一闋窮達在天愁不得當時短衣夜半悲飯牛
何如學取商頌聲金石

夜聞水車

旱火秋蒸土山熱新苗立死田寸裂西風何處送嗚嗚
一夜水車啼不歇水車身作水中龍赤脚蹋龍憐老翁
白水田頭月未落千畦萬畦雲雨同流蘇醉臥誰家子
有耳不聞汝啼苦水龍水龍汝勿苦及物無功得如汝

次韻陳騷民惜春

金尊瀉酒胡琴語白日長看華在樹東風一夜來戲人
老紅飛盡江南雨勸君莫苦愛流芳紅顏百歲終黃土
山人眼底不見春古檜陰陰翠虬舞

出無車

出門便有路路與天長盡何處今日出門去不去去時
喫苦不得住繭生脚背汗雨流草鞋穿破脚不羞大砂
小刺踏入肉疼痛連心眉總蹙前村落日起孤烟客子

苦飢還問宿歸來
資用無一存大悔三月不出門白面
年少命運好連鑣結駟隘衢道肯信無車一生老

僧兵守城行

驅僧為兵守城郭不知此謀誰所作
但言官以為盜防盜在深山嘯叢薄
朝朝上城候點兵羣操長干立槍槊
相看摩頭一驚笑竹作甕鏊殊不惡
平生獨抱我家法不殺為律以自縛
那知今日墮卒伍使守使攻受官約
謂僧非僧兵非兵未聞官以兵為詭
一臨倉卒將何如

盜不來時猶綽綽敵人日夜徂我城示以假兵無乃弱
我官自有兵與民願放諸僧臥雲壑

贈劉秀才

克新 六首

山之虎兮有爪如鐵馮婦搏之飲其血水之蛟兮有牙
如鉞周處斬之服其骨君既有才復有藝如何落魄風
塵際方今天子圖治惟賢求問閭談笑皆封侯何不攜
書奏之蓬萊宮佩取金印如斗歸山東

題馬

伯樂不復作世間有馬無人識
騄駼服鹽車垂首太行飢且驅
駑駘居天廐身被文繡餘芻豆吁嗟乎駑駘飽
騄駼飢雖有千里將奚為

茅山沈道士琅玕所

仙人種玉茅君山春風抽出青琅玕
萬箇森森翳雲日下有芝草長闌干
九秋瓊露墮瑤海鳳凰夜棲毛羽寒
仙人時來琅玕下采芝斲玉和神丹
丹成白晝上天去風鳴環佩聲珊珊

送湖州潘總管

昔日五馬來湖山千里俱蒿萊今朝五馬去湖山千里
皆禾黍五馬如蛟龍大旱作雲雨五馬如熊羆遠塞驅
豺虎五馬兮璫珂不可攀兮將奈何


壯丁行

去年差壯丁駕船下海討狂賊今年差壯丁荷戈遠戍
河南北去年行者秋已還今年去者無消息去年壯丁
初發時姑蘇驛前江水湄長槍巨戟各在手椎鼓鳴鉦

揚大旗爺娘頓足妻招手號哭向天淚如雨陰風蕭蕭
黃塵飛日落哭聲猶未已近聞河北新戰平血流如海
屍如城嗚呼安得盡銷天下之甲兵鑄作農器驅民耕

藿甕

先生食藿如食肉一日不食心不足淡然中有至味存
鳳髓龍肝何足論昔者韓公有高識五年太學朝朝喫
後來易蘭雖復知酒酣夜半一咀之長安少年那解此
羊肉如林酒如水酒瓶羊柵須臾壞先生藿甕長年在



古今禪藻集卷十四

欽定四庫全書

集部

古今禪藻集卷十五

七

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官中書臣葉葵

謄錄監生臣左熙世

欽定四庫全書

古今禪藻集卷十五

明釋正勉釋性通同輯

元 五言律詩

送才上人再往湖南

圓至 三首

近聞歸又出何事迫身忙
春路晴猶滑山亭晚更長
竹枯湘淚盡花發楚魂香
舊日曾行處因君思不忘

富塘

漾漾復澄澄長涵十畝清亦供貧者樂獨以富為名水
葉秋時死山苗旱歲生固應鍾異氣青樹鬱佳城

寄志勝上人

自說冬前至深寒信亦稀非知為事阻應怪與言違瘴
月人南去花時鴈北飛危欄有斜日獨望更依依

送張用鼎遊燕南

大訢十一首

天上知名久由來漢客星江湖歌白雪風露滿青冥巴
蜀須傳檄燕山待勒銘壯夫期遠大不獨抱遺經

次韻甯宣尉

將門三葉貴古劒削霜
劓霧卷烏蠻淨風生碧海青
投壺驚甲帳飛墨動雲屏
未悵清游興松房聽雨聲

送別二首

行役何時了宗門可罷叅
栖遲無杜曲留滯尚周南
渡水聞天磬登山禮佛龕
百年重回首風柳正毵蓀
沙鳥高低語江雲斷續飛
青山攜手別秋日故人稀
落芳心在悠悠昨夢非
歌長不用續鯨浪暗吹衣

趙大年小景

斷葦仍摧雪寒潮不上溝扁舟從此去一衲更何求望
遠支頤倦臨流照影羞披圖重有感空負五湖秋

庚午秋過淮安

百感何嗟及行人過楚州笛聲今夜月雲物何時古
驛依城住長河倚海流天王南狩日曾此駐鳴騶

送人奔父喪

死生千里別父子百年心淚盡黃泉咽愁來白晝陰雲

山通楚迴江水入淮深廬墓多祥應他年惠好音

過淮河口

水次千家市蠻商聚百艘揚徐元接壤河泗此交流乘
傳陪天使浮柁任海漚夜涼瞻斗柄想見上林秋

送薩天錫照磨赴燕南憲幕

蕭寺留詩別高懷不負公江聲元自急山勢古來雄下
榻疎鐘雨登臺落木風重來無幾日除道避乘驄

送睢陽王德明辟內御史府掾

巡遠睢陽後遺風士氣豪河經商邑壯山並閼臺高月
窟求龍種天池集鳳毛辟書寧易致不用歎賢勞

楊執中幼與予同舍自予去鄉里一別四十五年
矣乍見俱不相識承惠詩一首次韻謝之

勛業雙蓬鬢江湖萬里心扣舷山月近歌枕夜濤深多
士懷東觀何人賦上林只將絃上趣白雪寫遺音

山居

清珙

三首

道人緣慮盡觸目是心光何處碧桃謝滿溪流水香草

深蛇性悅日暖蝶心狂曾見樵翁說雲邊雪晝房

其二

紅日半銜山柴門便掩闌綠蒲眠褥軟白木枕頭彎松
月來先照溪雲出未還迢迢清夜夢不肯到人間

其三

結草便為菴年年用覆苦紙憲松葉暗竹屋蘚華粘麥
飯惟饒火藜羹不點鹽生涯隨分過誰管世人嫌

贈端禪人默持蓮經

清欲

掩卷轉蓮華寧論歲月賒未明窮子喻難到法王家雨
露無高下根莖有等差頭頭開示處功行幾恒沙

五日弔古

大圭 三首

楚國大夫去彭咸從所居祇今浮水馬何處問江魚異
俗悲遺事離騷讀舊書一觴川上酒斜日雨疎疎

世故

世故占星變吾生共月孤此時無夢寐長恐涉艱虞山
色宜茅屋松花滿飯盂素心將獨往及早謝人徒

次韻詹生懷陳衆中阮信道

舊遊陳與阮不見獨成吟
無復此聯壁為誰重鼓琴
朔方文字老南國酒杯深
今日風流遠令人恨滿襟

高同知懷傳軒

克新 五首

退食獨關情
商庭版築生
列星垂野大
落月照梁明
老去嗟何及
秋來夢不成
瘡痍滿天地
霖雨若為傾

次韻答劉鎮撫

茂陵舊公子
氣壓陣雲低
一節臨軍幕
三邊息戰鞞
賦

詩朝倚馬起舞夜聞雞為愛溪樓靜重尋水郭西

次韻答蘇太史

微雨作春寒兵戈道路難百年嗟遠別千里愧相看把
酒花連席揚舲雪滿灘水西官閣靜文字更盤桓

留月軒

我欲留明月月行那可留金波流錦席桂影散瓊樓斜
隱藤蘿石遠臨蘆荻洲長歌興無極門外露華秋

送蘭宣使還閩省

度浙春云盡還閩歲已闌戀親雙鬢白報國寸心丹使
節雲千里官船月一灘人生忠孝大來往莫辭難

舟次吳江

善住

客路渺無際崎嶇何日平積烟迷遠樹殘照下荒城水
宿先歸港朝行暗計程長橋知漸近笳鼓隔林鳴

古今禪藻集卷十五

欽定四庫全書

古今禪藻集卷十六

明釋正勉釋性通同輯

元七言律詩

送建昌黃綺秀才踰淮教授

圓至 二首

還山羞聽紫芝歌
旅館千門講四科
絳帳未懸知己少
黑裘漸敝閱人多
秋風白下沾巾別
落日青淮照影過
莫對飯盤嗔苜蓿
桑榆雖暖易蹉跎

義塚斜

城闕千棺瘞此斜古堆新穴滿平畬春叢亂哭鰥寡鳥
雨樹雜開啼笑花散骨已粘苔作肉凝魂猶認土為家
何人薄莫焚錢去風捲殘灰滿柏丫

詠梅花

明本 六首

見非恍惚夢非神雪後霜前分外真疎影暗消三弄月
半聯淒斷獨吟人歲寒搖落孤根在江驛荒涼往事塵
碎嚼幽香清可挹玉樓無復更臨春

玉簫起處暗驚神曲緩瑤臺逸韻真泉石幾年雲冷鶴
關山萬里月愁人香凝老樹調風味影落寒窓枕隙塵
檀板金尊久岑寂微吟不減昔時春

目送空山遠駐神似曾相識倍情真半床素被鋪寒玉
一幅生綃畫美人爽入冰姿欺國色悵隨哀曲黯京塵
三郎正愛霓裳舞珍重椒房自惜春

花前月下暗凝神一鶴西來訪子真蒼鬢黯憐姑射面
素衣夜怯廣寒人大千世界迷香霧十二樓臺鎖玉塵

個裡玄關誰為問如何藏得許多春

征路愁迷黯動神穿林入谷自尋真
亭亭有意冷移玉
默默無言空悵人夢斷陽臺半雲雨
淚空青塚幾沙塵
餘芳消歇繁華起野水蒼烟意自春

水中仙子鏡中神夜夜相携入夢真
龍雁哀殘埋玉地
朔風吹老弄蟾人寒添壩上雙眉凍
愁壓江南幾屐塵
雪裡不嫌清苦味一枝占斷九州春

山居二首

杳堂

亂流盡處卜幽棲獨樹為橋過小溪
春雨桃開憶劉阮
晚山薇長夢夷齊尋僧因到石梁北
待月忽思天柱西
借問昔賢成底事十年騎馬聽朝雞

白雲茅屋草離離地老天荒更不疑
樵徑有霜尋藥冷
石窻無月了經遲青牋夜雪憐蘇武
黃天西風歎李斯
千古青編在天下流芳遺臭更由誰

商山四皓圖

普彥明

劉氏何如呂氏安尺書便爾闔重關
空將鬢雪驚龍準

不道啼紅慘玉顏
鴻鵠聲寒悲曉殿
紫芝香冷怨秋山
千年猶昧深根術
又落巴童橘柚間

黃河阻風

大訢八首

九域重尋禹蹟荒
喜聽縣水夜浪浪
中原迤邐河流壯
元氣汪洋地脈長
萬里風雲來黠澹
五更星斗下光芒
我行不有神靈助
風送天香自帝傍

送郭幹卿學士赴奎章閣次趙魯公韻

歲晏俄聞上國行
安車可是莫年情
早朝翠霧沾衣濕

夜直銀河入坐清
社稷憂勤霜鬢短
江湖歸夢釣絲輕
相携不盡丁寧語
歌斷驪駒白下城

新到建業次王繼學侍御韻

翩翩筆勢捲春潮
自倚經綸答聖朝
瀚海天高霜鶚健
沙堤華發玉驄驕
只知鼇負三山重
誰信鵬搏萬里遙
今日烏臺還趣召
聚觀父老滿江橋

潛宮

御榻當年小殿西
龍光照地起虹霓
蓬萊珠館珊瑚樹

夜月瑤臺白玉梯
甲帳列營環衛密
龜茲按拍蹋歌齊
代來故事馮誰紀
只有年年杜宇啼

謝郭道淵以詩慶住新寺

住近城南尺五天
眼看金屋會羣仙
雲霞海上無三島
風月人間即四禪
父老多情思沛邑
從官有意賦甘泉
恩波不獨新蘭若
麟鳳呈祥五百年

送楊文舉赴江浙省宣使

凍解春泥柳未青
駢駢四牡在林坰
家聲奕世推韓斗

天上何人識使星黃閣盍簪春盎盎火城分直夜熒熒
明年重對賢良策第一臚傳出漢庭

賞心亭次韻

碌碌從人愧抱關賞心應共鶴飛還孤舟野水東西渡
落日長淮遠近山神鼓乍喧香霧合賓筵初散綠陰間
相思只尺長相隔一似河流九曲灣

次韻張夢臣侍御太子千秋日燕龍翔寺

天香一騎出燕山閭闔雲開近可攀華渚虹光瞻斗極

芒碭雲氣識龍顏紀綱吳楚東南重事業夔臯伯仲間
燕罷題詩烟景暮松高千尺鶴飛還

過安慶弔余忠宣公

法智

浮圖高出暮雲低雉堞連雲碧樹齊茅屋人家兵火後
樓船鼙鼓夕陽西大江千里水東去明月一天烏夜啼
欲酹忠魂荒塚外白楊秋色轉淒迷

山居

清珙 二首

吾家住在雪溪西水滿天湖月滿溪未到盡驚山險峻

曾來方識路高低
蝸沿素壁粘枯殼
虎過新蹄印雨泥
閒閉柴門春晝永
青桐華發畫胡啼

會趙初心提舉

老來脚力不勝鞋
竹杖扶行步落華
待月伴雲眠蘚石
尋梅陪客過隣家
粥香瓦鉢山田米
雪汎甕甌水磨茶
今日為君時斲出
此心常只在烟霞

湖月簡閒中

大圭

秋近清波荷葉圓
葉陰疎處見青天
偶臨湖坐得佳樹

欲傍花行無小船
林院鶴歸山色外
水亭人去夕陽前
深知碧玉壺中樂
一笑臨風揖地仙

送王中丞赴浙西使

克新
二十首

西湖水泮柳初青
五夜雲天動使星
烏府十年驚白髮
黃麻千里下青冥
秋霜舊柏陰連屋
春雨高槐綠滿庭
衣繡重臨邦士喜
兒童騎竹擁江亭

送茅山王道士

緱氏山頭醉碧桃
茅君洞裏奏瑤簫
林間放鶴歸蓬島

月下騎鯨渡海潮
石室雲寒珠樹老
丹田春暖玉芝饒
列仙琳館成灰劫
萬里江湖酒一瓢

竹林讀書處

蘭家孫子讀書處
萬箇琅玕擁碧幢
六月繁陰分峴首
九秋蒼雪墮湘江
墨池暖浴鵷雛並
玄圃晴飛翠羽雙
南國宦遊戎馬隔
月明歸夢繞螢窗

送汪公輔會試兼簡張祭酒

歲晏征車指帝閭
鴈飛沙塞雪紛紛
鳳皇爭覩岐陽瑞

騏驎應空冀北羣
瓊館燕酣花作陣
紫宸朝散馬如雲
煩詢祭酒圖書府
千里須傳諭蜀文

送王尚書還朝兼簡張學士

文采丹山一鳳毛
吳藩徵釀獨賢勞
飛帆轉海南風正
曳履趣廷北極高
花擁御筵歌湛露
香浮官甕賜蒲桃
朝迴為報張燕國
莫把新詩奪錦袍

題清心堂帖卷後

山郭高堂花木新
夜虹穿屋結晴雲
繞床蛇蚓鍾王字

滿架琳瑯秦漢文筆塚秋烟迷鳥跡墨池春雨散鷺羣
為憐書法湮淪久亂後題詩獨憶君

岳飛墓次劉治中韻

西湖水色映陽阿偃月堂連瑪瑙坡方擁貔貅驅敵衆
豈期鷹隼被虞羅兩宮天遠嗟何及中土溝分恨轉多
異代英雄同感慨酒酣彈劍一悲歌

寄唐伯剛斷事

鳳麟洲接鳳凰池秋雨春雲入夢思三尺光芒雷令劍

百篇風月杜陵詩湖邊躍馬花迎節江上聽鶯酒滿卮
底事淮陽微不起空令野老望旌麾

次韻寄開元方厓禪師

我家黃髮大中郎文采多應雨露藏弟子鳳凰吟總好
故人蝴蝶夢何長清秋葉覆臺前石白晝花深竹裏床
著處都緣龍象繞綠陰猿鶴識天香

次韻陳敬初員外留題三塔寺

南省郎官金馬客使車遙駐郭西林龍宮乞水波濤險

鴈塔題詩薜荔深
世外烟花春爛漫
雲端幢戟夜蕭森
十年海國論文舊
風雨滄江辱屢尋

濮元帥別業

海國元戎鬢未斑
歸來拄笏看青山
田園暮景烟塵外
臺榭春風錦繡間
桐影連溪鷗臥穩
桂香吹月鶴飛還
碧尊絲餽黃花酒
時向樽前一解顏

題本上人望松圖

丘隴青松天一涯
兵戈千里未還家
潮迴滄海鯨波險

金
卷十六
路入丹山鳥道賒心逐孤雲飛落日夢隨明月上浮槎
野夫亦抱終天恨何處相期賦白華

寄杜尊師

當塗貞士金門客孫子詵詵總鳳毛石室圖書香霧合
洞天樓觀彩雲高秋風吹笛龍吟水夜月彈琴鶴在臯
春雨一蓑苔渚上重攀鐵鎖聽仙璫

送除上人之武林

雪花飛送浙江船歌斷驪駒一惘然荊棘銅駝淒暮雨

樓臺鐵鳳墮秋煙遼東鶴返塵生海石上人歸月在川
回首六橋楊柳外水光山色共晴天

初至鵲李

通越門中逢故人
夷溪橋上送餘春
燕飛官巷桃花老
鶯轉江亭楊柳新
行李風塵千里道
緼袍天地百年身
未聞淮海休兵甲
回首關山一損神

題山陰圖送別

杖藜何處訪幽居
萬壑千巖一草廬
花發湖頭兵散後

船回谿上雪飛初風流遠挹蘭亭會靈祕深探禹穴書
歌罷陽關仍進酒隔江鼙鼓正愁予

送帖尚書還朝兼簡危叅政

臨遣皇華選上班尚書持節下天關江南王賦三年入
海上仙槎五月還奏疏紫雲開雉尾進圖紅日繞龍顏
故人鳳沼經綸久歲晚歸耕何處山

送日本成上人

浮海東來一葉身鷗波浩蕩孰能馴十年風雨南游楚

萬里關山西入秦書寄蕃航歸故國詩題蕭寺送青春
誅茅深入封禺底莫種桃花引世人

次韻茅經歷聽雨

秋來客裏易愁生夜半燈前風雨聲常恐浸淫禾耳出
豈宜滂沛馬頭傾十年郡邑疲徵賦千里關河苦用兵
端是長官憂國計天時人事總關情

寄題敞雲樓

林杪飛樓對碧峯屋頭雲氣逐飄風五更星斗朱闌外

故國山川錦席中華表月明歸白鶴赤霄秋淨送冥鴻
登臨欲寫江南意王粲當年賦未工

次韻顧仲瑛遷居

畫舸載書隨早春平湖雪消楊柳新黃鸝九霄不可致
白鷗萬里誰能馴謝安自是廟堂器元亮本非丘壑人
聖主徵賢圖治急未容便作耕桑民

登姑蘇城

城上旌旗烟霧重樹頭初日出雲紅一溪鷗散桃花雨

兩岸鶯啼楊柳風邊塞鼓鞞終日振鄉關道路幾時通
江南春色渾依舊桑柘青青門巷空

岳飛墓次吳府判韻

湖上孤墳青草生一門忠孝擅嘉名力扶社稷還歸正
誓取山河不用盟先帝終天讐未復大臣欺國志中傾
丈夫自昔皆如此感激英雄萬古情

送集賢都事范文炳開赦還朝

紫色泥書下九天皇華直到海東邊馬行齊魯山千里

帆渡江淮雨一川西掖梧連金井月上林花擁玉爐烟
秋風歸去承殊渥四牡工歌玳瑁筵

奉寄崇報仁禪師

行中禪師與予同生番禺而長予十三歲早以徑山
書記主蘄之德章道化盛行於江淮間嘗為蘇長公
祠堂記虞侍講極稱其文有史筆以辟難來江浙未
幾主餘姚雲頂近又聞遷紹興崇報予以睽違之久
而喜其屢鎮名山為吾宗砥柱於是詩以慶之且求

教也至正十七年秋九月既望

故園人物久相知今代文章真一夔千里江山春草夢
十年兵甲暮雲詩著書芸閣虹穿屋行道松林月照池
聞說高居隣栢府牙冠驄馬共襟期

次韻答柳仲脩宣使

青袍白馬南藩使解后江城三月初把酒流鶯啼別圃
倚樓飛絮落前除君趨大府才華盛我住空山禮法疎
携手勿論鄉國事十年兵甲復何如

次韻聞人德機同知追賦元正朝賀之作

五雲春色滿蓬萊
丹陛旌旗日月開
香繞衮龍青玉案
花迎鸚鵡紫霞杯
聖神有志宣光業
經濟何人管葛才
此日鵷行猶在眼
董生承詔自天來

錢塘懷古

越僧

天定終難恃
武功不堪雙
淚濕東風百年南
渡斜陽外
十里西湖片雨中
燕子來時龍輦去
楊花飛盡鳳樓空
倚筇曾向高峯望
山掩江城霧氣籠

古今禪藻集卷十六